

# **Musa arah kaji semula tugas agensi pertanian**

Bahan asal dari Arkib  
Negara Malaysia

KUANTAN, Jumaat — Datuk Musa Hitam hari ini mengarahkan Kerajaan Negeri Pahang mengkaji semula peranan, tugas dan tanggungjawab Lembaga Kemajuan Perusahaan Pertaniannya.

"Saya dapati, barangkali Lembaga ini tidak perlu diteruskan. Sebab semua tugas dan tanggungjawabnya sebenarnya boleh diuruskan oleh jabatan-jabatan Kerajaan Negeri dan Persekutuan yang ada.

"Tugas dan tanggungjawab Lembaga ini pada mulanya untuk membuka tanah sejumlah 2,000 hektar bagi mencari punca kewangan Kerajaan Negeri.

## **Tugas dan tanggungjawab**

"Tetapi, kini nampaknya Lembaga ini mencari punca kewangan bukan untuk Kerajaan Negeri tetapi untuk kewangan menampung pentadbiran organisasinya," kata Datuk Musa.

Timbalan Perdana Menteri memberitahu satu sidang akhbar di akhir lawatannya ke Pahang hari ini, tujuan seperti itu tidak bermakna.

Selanjutnya, Lembaga ini menjalankan tugas mentadbir dan

## **Bukan tohmah tapi kepastian**

melaksanakan rancangan Tanah Pemuda, rancangan tanah pinggir dan pemindahan semula mangsa banjir, rancangan tanah kecil serta rancangan penempatan semula keselamatan dan rancangan tanah berkelompok.

Datuk Musa mendapati tugas dan tanggungjawab ini boleh dilaksanakan oleh agensi-agensi lain yang wujud sekarang.

"Saya harap perkara ini akan diteliti oleh Kerajaan Negeri dengan mendalam supaya kita dapat mengelakkan perkembangan birokrasi semata-mata untuk birokrasi, dan bukannya untuk kemajuan rakyat pada keseluruhannya.

"Ini bukanlah satu tohmah tapi satu kepastian yang saya buat dan saya telah meminta persetujuan Kerajaan Negeri di mana Menteri Besar bersetuju membuatnya," katanya.